

玉函山房輯佚書

目耕帖卷十六

歷城馬國翰竹吾甫

詩四

漢書地理志陳本太昊之虛周武王封舜之後嬀滿  
於陳是爲胡公妻以元女大姬婦人尊貴好祭祀  
用史巫故其俗尙巫鬼陳詩曰坎其擊鼓宛邱之  
下亡冬亡夏值其鷺羽又曰東門之枌宛邱之栩  
子仲之子婆娑其下此其風也吳季札聞之歌曰  
國亡主其能久乎漢書匡衡傳亦謂陳夫人好巫

而民多淫祀

子之湯兮毛傳湯蕩也鄭箋游蕩無所不爲王逸楚辭離騷章句引詩作子之蕩兮云蕩蕩無所思慮貌也蕩用今文訓亦與鄭小異

坎其擊缶毛傳盎謂之缶正義缶是瓦器可以節樂若今擊甌案段安節樂府雜錄唐武宗朝郭道源善擊甌以邢甌越甌十二隻旋加減水其中以箏擊之當是擊缶之遺意

徐常吉毛詩翼說先王之制春秋教以禮樂冬夏教

以詩書未有無冬無夏而一以舞爲事者此商書所謂恒舞也

子仲之子毛傳子仲陳大夫氏鄭箋之子男子也南方之原傳原大夫氏箋以南方原氏之女可以爲上處案此與采唐篇孟姜孟弋孟庸同義男女雜述亟會於道路歌舞於市井故指其人以惡之也朱道行詩經集思通如莠之贊男悅女握椒之奉女暱男也直與溱洧秉蘭贈勺同風無復先王家教之遺矣

穀且于差釋文鄭初佳反擇也王音嗟徐七何反沈云毛意不作嗟案毛無改字宜从鄭讀翰案詩言穀且則差擇義確不可易王肅雖本韓詩作嗟不如鄭讀之優也

說文解字女部娑字引詩市也娑娑釋文出娑娑字在穀且上云娑步波反說文作娑則意以娑娑其下當同作娑娑也又案王符潛夫論浮侈篇引詩作女也娑娑與毛及說文並異

黃樞詩解陶之俗其男耕其婦饁其女桑至於八月

載績則蠶事畢而麻事起矣今陳國男女乃至不  
績其麻市也婆婆所謂上有好者下必有甚焉者  
矣翰案敬姜之績雖則防逸生淫亦以挽回積俗  
衡門之下釋文衡橫也沈云此古文橫字案藝文類  
聚卷六十三引劉楨毛詩義問橫一木作門而上  
無屋謂之衡門

蔡邕郭有道碑棲遲泌邱又周巨勝碑洋洋泌邱東  
哲元居釋亦曰夫何爲乎泌邱張揖廣雅釋邱邱  
上有木爲泌邱蔡用魯詩同毛作泌束皙張揖作

秘當是齊韓詩而同以邱爲言則與毛傳泌訓泉  
水者異矣

可以樂飢釋文以樂本又作療沈云逸詩本有作疒  
下療以形聲言之殊非其義療字當從疒下療案  
說文云療治也療或療字也則毛止作樂鄭本作  
療案韓詩外傳列女傳引詩並作可以療飢此沈  
重所據以疑療字之非義也陸引說文以駁沈意  
仍從鄭作療臧氏拜經日記鄭作療飢不云樂當  
爲療是經本作療也據正義云定本作樂飢知孔

木經文作瘵飢矣文選王元長永明十一年策秀才文注唐石經後收刻足利古本皆作可以瘵飢正義引王肅孫毓云皆云可以樂飢忘道是傳中樂道忘飢之言非毛氏本文乃王肅所私撰而孫毓從之也考辨極爲精覈

東門之池釋文引孔安國曰停水曰池案安國是申公弟子此是魯詩義

列女傳卷二引詩彼美淑姬可與寤言又引彼美孟姜可與寤言王照圓補注此木二詩傳以意合之



翰案漢志引詩多用此例又韓詩外傳引詩彼美淑姬可與晤言寤作晤

東門之楊毛傳言男女失時不逮秋冬鄭箋失仲春之月正義荀卿書云霜降逆女冰泮殺止霜降九月也冰泮二月也然則荀卿之意自九月至於正月於禮皆可爲昏荀在焚書之前必當有所憑據毛公親事荀卿故亦以秋冬言之家語云羣生閉藏爲陰而爲化育之始故聖人以合男女窮天數也霜降而婦功成嫁娶者行焉冰泮而農業起昏

禮殺於此又云冬合男女春頒爵位家語出自孔  
家毛氏或見其事故依用焉又引董仲舒云聖人  
以男女陰陽其道同類歟天道秋冬而陰氣來嚮  
春夏而陰氣去故古人霜降始逆女冰泮而殺止  
與陰俱近而陽遠也鄭以昏姻之月唯在仲春故  
以喻晚失仲春之月鄭不見家語不信苟卿以周  
禮指言仲春之月令會男女故以仲春爲昏月翰  
案霜降逆女冰泮殺止自是古法周禮地官媒氏  
仲春之月令會男女於是時也奔者不禁謂嫁娶

之期不得過此月耳然則毛鄭之義固兩相成也  
墓門序刺陳佗也而列女傳記此詩甚異傳云辨女  
者陳國采桑之女也晉大夫解居甫使於宋道過  
陳遇採桑之女止而戲之曰女爲我歌我將舍汝  
桑女乃爲之歌曰墓門有棘斧以斯之夫也不良  
國人知之知而不已誰昔然矣大夫又曰爲我歌  
其二女曰墓門有榛有鴉萃止夫也不良歌以詆  
之詆予不顧顛倒思予大夫曰其榛則有其鴉安  
在女曰陳小國也攝乎大國之間因之以饑饉加

之以師旅其人且亡而小鶚乎大夫乃服而釋之  
君子謂辨女貞正而有辭柔順而有守又王逸楚  
詞天問章句解居父聘吳過陳之墓門見婦人負  
其子欲與之淫泆肆其情欲婦人則引詩刺之曰  
墓門有棘有鴉萃止言墓門有棘雖無人猶有鴉  
汝獨不愧也案列女傳云女乃爲之歌歌舊詩也  
楚詞章句明言引詩刺之蓋本陳人刺佗之詩而  
桑女又引以刺解居父非謂桑女作此詩也楚詞  
章句又引詩諄予不顧諄諫也攷釋文訊之本又

作諄音信徐息倅反告也韓詩訊諫也則訊諄古  
字通用矣王照圖列女傳補注引楚詞注以爲注  
及此傳所言蓋皆魯詩之說也又謂煤當作棘馬  
氏瑞辰曰今按玉篇古文某作𣎵𣎵形似棘蓋譌  
作𣎵因之毛詩作檇又作煤耳

成伯璠毛詩指說引梁簡文帝十五國風義詩者思  
也辭也發慮在心謂之思言見其懷抱者也在詩  
爲辭在樂爲歌其本一也故云作好歌以訊之案  
簡文書佚僅見此條

防有鵲巢邛有旨茗手傳防邑也邛邱也後漢書郡國志陳國陳縣劉昭注引博物記曰邛地名在縣北防亭在焉詩曰邛有旨茗防有鵲巢二地毗連故詩人指目之

誰併予美鄭箋所美謂宣公也程子曰予美心所賢者一言下之誑君以謾人一言好之誣善以害人皆作詩者憂患之意亦本詩序憂讒賊爲說也

說文解字鵲綬也引詩邛有旨鵲集韻入聲二十三錫鵲鵲引說文或作鵲亦從鵲陸佃埤雅邛有

旨鵠言欲有文采具備以成條理之臣如鵠者不  
賊賊之而後得焉或曰鵠殺鳥也故鵠有雜色似  
綬其字從鵠

月出序止言刺好色也不指爲誰而作賈誼叔先生  
嘗稱或說刺陳靈公也靈公與其大夫孔寧儀行  
父通於夏徵舒之母夏姬飲酒於夏氏公謂行父  
曰徵舒似汝對曰亦似君徵舒病之詩人作刺正  
謂此事詩中舒字卽謂徵舒竊糾慢受天紹皆憊  
憤繫結之意言徵舒將難堪其恥故智者爲之勞

心也以下章採林直斥其邑夏南顯言其字例之說亦不爲無見也

月出皎兮釋文出皦字云本又作皎今注疏本作皎說文解字皎月之白也引詩亦作皎文選謝希逸月賦注引陳風口月出皦兮佼人僚兮張參五經文字皦皎今詩風通用之佼人僚兮釋文佼字又作姣僚字又作嫖史記司馬相如列傳司馬貞索隱釋元應一切經音義卷九皆引詩姣人嫖兮則別本有作女旁者



目耕帖

卷十六

佼人憫兮釋文出劉字云本又作憫今注疏本正作  
憫賈昌朝羣經音辨作劉與釋文同

勞心慘兮釋文慘七感反憂也案五經文字懔干到  
反見詩風則此當作懔陸音非也

朱善詩解頤牆茨作而狄入徯株林詠而楚入陳是  
之謂女戎

有蒲與荷正義引樊光爾雅注作有蒲與茄茄古荷  
字傷如之何爾雅釋詁台朕賚畀卜陽予也郭璞  
注引魯詩陽如之何今巴濮之人自呼阿陽拜經

日記唐人義疏引某氏注爾雅卽樊光也其引詩  
並與毛韓不同蓋本魯詩然則荷作茄亦魯詩本  
也

碩大且儼太平御覽卷三百六十八引韓詩曰碩大  
且嬌薛君注嬌重頤也五檢反文選張茂先雜詩  
注引韓詩寤寐無爲展轉伏枕淮南子說山訓高  
誘注引詩亦作展高亦習韓詩者也釋文輾轉一  
本作展則毛舊本與韓詩並作展也

毛詩國風檜羔裘詁傳訓第十三鄭氏檜譜並作檜

左傳襄二十九年自鄆以下無譏焉檜作鄆漢書  
地理志其濟洛河潁之間子男之國號會爲大檜  
又作會鄆道元水經注引劉瓛曰鄆在豫州外方  
之北北鄰於號鄆榮之南左濟右洛居陽鄭兩水  
之間食溱洧焉范處駿詩補傳引王肅注周武王  
封祝融之後於濟洛河潁之間爲檜子正義案鄭  
語史伯於幽王之世爲桓公謀滅號檜至平王之  
初武公滅之則幽王以前檜公猶在史伯云檜仲  
恃險則仲是檜君之字檜之世家旣絕作序者不

言檜仲則羔裘之作在檜仲之前不知幾世也

王符潛夫論志氏姓篇曾在河伊之間其君驕貪奢  
儉滅爵損祿羣臣卑讓上下不臨詩人憂之故作  
羔裘閔其痛悼也又云匪風冀君先教也會仲不  
悟重氏伐之上下不能相使禁罰不行遂以亡也  
此並是三家佚說

蘇轍穎濱詩說羔裘序云大夫以道去其君夫君好  
盛服不爲大惡而去之何哉檜君之羔裘卽魯郊  
之燔肉也諱其大惡而以微罪行君子之心也

羔裘逍遙楚詞九歌湘君王逸章句引詩作狐裘逍  
遙云逍遙遊戲也又九辨章句引詩旃旒其華臧  
氏庸云卽毛詩猗猗其華案玉所引詩皆非誤字  
所據本異耳

姚氏飛惜抱軒詩說狐裘以朝爲燕見解爲諸侯朝  
天子非是

庶見素冠兮毛傳素冠練冠也鄭箋喪禮旣祥祭而  
縞冠素紕正義鄭以練冠者練布爲之而經傳之  
言素者皆謂白絹未有以布爲素者則知素冠非

練也且時人不行三年之喪當先思長遠之服何得先思其近乃思其遠又不能三年者乃謂三年將終少日月耳若全不見練冠便是葬既釋服三年之喪纔行其半違禮甚矣何止刺於不能行三年也故易傳以素冠爲既祥之冠又云王肅亦以素冠爲大祥之冠孫毓以箋說爲長

呂氏春秋任地篇高誘注引詩云棘人之樂樂言羸瘠也有之字無兮字蓋韓詩如此又列女傳引詩我心傷悲聊與子同歸下無兮字蓋魯詩如此

集韻平聲下二仙從緣切博爾雅博博憂也郭璞讀然則郭讀詩勞心博博亦作全音矣

集韻上聲三十三哥倚可切猗阿柔貌詩猗猗其枝或作阿

漢書王吉傳引韓詩說曰是非古之風也發發者是  
非古之車也揭揭者韓詩外傳引傳曰國無道則  
飄風厲疾暴雨折木陰陽錯氣夏寒冬溫春熱秋  
榮日月無光星辰錯行民多疾病國多不祥寧生  
不壽而五穀不登當成周之時陰陽調寒暑平羣

生遂萬物寧故曰其風治其樂運其驅馬舒其民  
依依其行遲遲其意好好詩曰匪風發兮匪車揭  
兮顧瞻周道中心怛兮此所引傳蓋魯詩傳也

說文解字喫疾也引詩匪風喫兮案喫古文隸作𦵏  
漑之釜鬻釋文漑之本又作概案說文解字概漑也  
引詩概之釜鬻儀禮饋食禮釋文亦從手

說苑善說篇引詩曰孰能烹魚漑之釜鬻誰將西歸  
懷我好音以爲物之相得固甚微矣懷之作懷我  
姚舜牧詩經疑問簡兮詩云誰之思西方美人匪



風詩誰將西歸懷之好音當時致思於西周者蓋如此

詩緝含神霧鄒鄒衙王鄭此五國者于里之城處州之中名曰地軸又曰大齊地處孟春之位海岱之間土地汚泥流之所歸利之所聚律中太族音中宮角又曰魏地處季冬之位土地平夷又曰唐地處孟冬之位得常山太岳之風音中羽其地磽确而收故其民俗而好商又曰秦地處仲秋之位男懦弱女高瞻音中商其言舌舉而仰聲清而揚又

曰陳地處季春之位土地平夷無有山谷律中姑  
洗音中宮徵又曰曹處季春之位土地勁急音中  
徵其聲清以急此散見於北堂書鈔太平御覽所  
引其文脫略不具十五國風又缺二南檜幽意其  
十二律配合一十五國中有一合併亦十二分野之  
法也又李淳風乙巳占引詩緯推度災鄰國爲結  
蟪之宿營室之精也應亦分十五國言之他無所  
見

蟬序國小而迫釋文一本作昭公國小而迫案鄭

譜云好奢而任小人曹之變風始作此詩箋云喻  
昭公之朝是蜉蝣爲昭公詩也譜又云蜉蝣至下  
泉四篇共公時作今譜本此序多無昭公字崔氏  
集注本有未詳其正也案今注疏本亦有昭公二  
字蓋蜉蝣篇爲刺昭公詩侯人以下則共公時詩  
鄭譜自相矛盾當從前一說

衣裳楚楚釋文引說文作黼黼云繪五彩鮮色也蓋  
古文如此采采衣服文選補正平鸚鵡賦注引韓  
詩同薛君曰采采盛貌也與毛傳訓衆多亦相近

蜉蝣掘閱毛傳掘閱容閱也鄭箋掘閱掘地解閱謂其始生時也以解閱喻君臣變易衣服也集傳引孔疏云此蟲土裏化生掘地而出形容解閱也閱悅懌之意及讀管子掘閱得下乃知閱與悅通也黃氏曰抄掘閱謂掘地而出升騰游翔王雪山云管子曰掘閱得下恐當時常談如此掘閱挑撥貌戴氏考正掘按說文引此作堀云突也突者堀起之意卽箋所謂掘地也荀子言良賈不爲折閱不市折損也閱賣也蓋閱與脫通箋所謂解閱正是

此義然則蟬蛻掘闕宜從箋說爲始生時掘起解  
脫掘掘通用闕通爲脫

禮記表記子曰君子不以口譽人則民作忠故君子  
問人之寒則衣之問人之飢則食之稱人之美則  
爵之國風曰心之憂矣於我歸說鄭注欲歸其所  
說忠信之人也正義此則引詩斷章不與詩相當  
案欲歸忠信之人正是疾惡虛華之義記固與詩  
相通也

何戈與殷禮記樂記行其綴兆鄭注綴表也所以表

行列也引詩作荷戈與綬正義今按詩荷戈與綬不同者蓋鄭見齊魯韓詩本不同也案正義引詩作荷今注疏作何

禮記表記是故君子衰經則有哀色端冕則有敬色甲冑則有不可犯之色詩云維鵜在梁不濡其翼彼詎之子不稱其服鄭注鵜鵜胡污澤也污澤蓋居泥水之中在魚梁以不濡汚其翼爲才如君子以稱其服爲有德與詩箋不同左傳僖二十四年引詩曰彼已之子不稱其服其作已與禮記引詩

作彼記者又異劉賓客嘉話錄引施士丐說詩維  
鵜在梁云梁人取魚梁也言鵜自合求魚不合於  
梁上取其魚譬之人自無善事攘人之美者如鵜  
在人梁上焉亦不失比興之意

說文解字嬀女黑色也引詩嬀兮蔚兮舊作嬀貼下  
季女爲義與毛義迥別

戴氏震毛鄭詩考正候人末章云前二章言小人之  
不克稱其寵此章則言君子雖遭退廢處困窮而  
不失常度故曰舊蔚然者南山之朝朝升雲也婉

變然者季女之於斯守飢也蓋美其守而悲之  
荀子勸學篇引詩曰尸鳩在桑其子七兮淑人君子  
其儀一兮其儀一兮心如結兮故君子結於一心  
又富國篇引詩淑人君子其儀不忒其儀不忒正  
是四國以爲仁人之用國非特將持其身而已又  
將兼人又議兵篇亦引此詩四語云近者親其善  
遠者慕其德兵不血刃遠邇來服德盛於此施及  
四極說苑反質篇引尸鳩在桑四句下引傳曰尸  
鳩之所以養七子者一心也君子之所以理萬物



者一儀也列女傳卷一亦引尸鳩在桑六句言心  
之均一也尸鳩以一心養七子君子以一儀養萬  
物一心可以事百君百心不可以事一君又卷四  
引淑人君子其儀不忒言善人於威儀無差忒案  
荀子爲魯詩所從出劉向世傳魯詩此皆一家之  
說也漢書鮑宣傳引詩亦作尸鳩與荀子說苑列  
女傳引詩同當亦用魯詩也呂氏春秋先己篇云  
昔者先王成其身而天下成治其身而天下治故  
善響者不於響於聲善影者不於影於形詩曰淑

人君子其儀不忒其儀不忒正是四國言正諸身也精理名言亦堪誦

邱光庭兼明書曹風鵲鳩云淑人君子其帶伊絲其弁伊騏箋云刺不稱其服也明日按下文云淑人君子其儀不忒序云在位無君子用心之不一卽此刺無君子詩人思時君子以其在位故上章言君子之心下章言君子之治此章言君子之服皆謂今在位無此君子也非謂刺不稱其服且經云淑人君子安得不稱其服耶

其弁伊騏釋文騏綦文也說文作璚云弁飾往往冒  
玉也或亦作璚案說文璚或作璚此當爲或亦作  
璚

陳傳良毛詩解詁檜亡東周之始曹亡春秋之終匪  
風懷周道慨天下之無王下泉念周京傷天下之  
無霸亂極思治也嚴粲詩緝鄭風褻褻思大國之  
見正蓋齊桓未霸也曹共公時晉文霸業方盛而  
係思郇伯何耶文以私憾虐曹也下泉愧木瓜矣  
二說具有卓識

王逸楚詞九歎章句慨歎貌也引詩慨我寤歎與毛詩作慼具

郇伯勞之毛傳郇侯文王之子爲世伯案郇卽左傳所謂畢原鄆郇之郇也又廣韻郇音戶闕切集韻胡關切皆姓也漢有郇越唐有郇模王世貞宛委餘編郇越之郇音荀郇模之郇音環案今益都有郇姓讀環音蓋郇模之後也

漢書地理志昔后稷封釐公劉處豳太王徙邠文王作鄆武王治鎬其民有先王遺風好稼穡務本業

故幽詩言農桑衣食之本甚備又匡衡傳引詩大  
王躬仁邠國貴恕幽作邠白虎通引詩亦作邠  
歐陽修詩本義謂七月詩齊魯韓三家皆無之案王  
符潛夫論浮侈篇七月詩大小放之周而復始攷  
符引詩多與毛異此必述三家之說恐廬陵傳聞  
有誤也

漢書律歷志哀公十二年冬十二月流火非建戌之  
月也是月也螽故傳曰火伏而後蟄者畢故火猶  
西流司歷過也詩云七月流火鄭志孫皓問月令

季夏火星中前受東方之體豈以爲火星季夏中心也不知夏至中星名答曰日永星火此謂大火也大火次名東方之次有壽星大火析木三者大火爲中故尙書云舉中以言焉又每三十度有奇非特一宿者也季夏中火猶謂指心火也案正義引此作吳志以禮記月令正義載鄭答孫顯云星火非謂心星也卯之三十度總爲大火約此節之文知吳志爲鄭志之誤也

一之日昴發二之日栗烈楊慎丹鉛錄以昴栗羌管

解之引俗諺三九二十七牆頭吹簫栗爲證極有  
思致

太平御覽卷八百一十六引韋輝光毛詩問曰七月  
之詩無褐箋云褐毛布也賤者之所服也今蜀亦  
用爲之案隋志梁有毛詩答雜問七卷吳侍中韋  
昭侍中朱育等撰毛詩義注四卷亡輝光疑晉人  
避司馬景王諱改稱如韋曜也

三之日于耜四之日舉趾毛傳三之日夏正月也阡  
土晚寒于耜始修耒耜也四之日周四月也民無

不舉足而耕矣太平御覽卷八百二十三引韓詩  
曰三月之時可預取耒耜修繕之至於四月始可  
以舉足而耕也此言三月當是謂周之三月劉敞  
七經小傳詩有夏正無周正七月陳王業六月北  
伐十月之交刺純陰用事而日食四月維夏六月  
徂暑言暑之極其至皆夏正也戴溪續呂氏家塾  
讀詩記一日二日說者以爲周正豳風先公之事  
周未建正也夫數窮於十月正月去十月數之窮  
也故詩人以十有一月謂之一之日自一而數之



避月而言日者懼其與月相亂也黃氏日抄取岷  
隱此說案晦翁云一之日謂斗建子一陽之日變  
月言日言是月之日也二說相參方備蓋主於陽  
復而再起數雪山亦云一之日至四之日皆以陽  
長言之困學紀聞王介甫詩說云彼曰七月九月  
此曰一之日二之日何也陽生矣則言日陰生矣  
則言月與易臨至于八月有凶復七日來復同意  
何岷瞻三箋謂此說精審有味

漢書食貨志春令民畢出在野冬則畢入於邑其詩

曰四之日舉止同我婦子饁彼南畝又曰十月蟋蟀入我牀下嗟我婦子聿爲改歲入此室處所以順陰陽備寇賊習禮文也

饁彼南畝田畯至喜鄭箋喜讀爲饁饁酒食也耕者之婦子俱以饁來至於南畝之中其見田大夫又爲設酒食焉言勤其事又愛其吏也孫毓云小民耕農妻子相饁雖有糞缺迎賓之敬大夫儼然銜命巡司何爲辱身就耕民公姬於壟畝之間共飲食乎正義引孫說以爲不然云飲食之事禮之所

重大夫之勸迎周公籩豆有踐鄭人之愛國君欲  
授之以殮何獨田畯之尊不可爲之設食也說其  
爲設酒食言民愛其吏耳何必田大夫皆仰田間  
食于此爲鄭箋圓成亦有理究之改易經字未爲  
安也

蔡邕考城縣頌女執伊筐用詩語女執懿筐也邕書  
石經用魯詩蓋魯詩懿筐作伊筐

春日遲遲采繁祁祁女心傷悲殆及公子同歸毛傳  
繁白蒿也所以生蠶祁祁衆多也傷悲感事苦也

春女悲秋士悲感其物化也殆始及與也幽公子  
躬率其民同時出同時歸也鄭箋悲則始有與公  
子同歸之志欲嫁焉女感事苦而生此志是謂幽  
風案箋之易傳與上說田峻至喜並是言幽國民  
之於上有家人婦子之誼親愛之至也此據婦人  
謂嫁曰歸較改喜爲歸者尤近理集傳申其義云  
蓋是時公子猶娶於國中而貴家大族連姻公室  
者亦無不力於蠶桑之務故其許嫁之女預以將  
及公子同歸而遠其父母爲悲也較鄭箋爲同足

戴氏考正按經傳中男女皆曰子後爲公子裴自  
陶之男子言之謂陶公之子也此及爲公子裳自  
陶之女子言之則謂陶公之女公子也自注春秋  
傳有女公子之稱又云自見公之女公子及民之  
女于有及時將嫁者詩託此爲之辭曰殆及公子  
同歸言將與公之子同時而嫁也此於言外見上  
下相知如一家不煩曲折而語無滲漏矣牟陌人  
詩說女周公之女公子謂郇伯之子立說奇異未  
知何據

蠶月條桑釋文條徒雕反引沈暢遙反集韻平聲下  
四皆癡宵切條枝落也引詩蠶月條桑沈重讀與  
超音同今不知有此音矣

七月鳴鵲正義引王肅云蟬及鵲皆以五月始鳴今  
云七月其義不通也古五字如七以爲此理亦可  
通但不知經文實誤否也案樊光爾雅注春秋伯  
趙氏司至者也伯趙鵲也以夏至來以冬至去七  
月漸寒鵲尙未去幽人聞其鳴聲以爲知時之鳥  
若爲載績驚焉者故八月共勤於績也與禮記月

令鴈始鳴紀候不同經文非誤也

三之日于耜毛傳幽上晚寒七月鳴鴈二之日其同  
鄭箋並云幽地晚寒正義於鳴鴈云此箋當言晚  
溫而亦言晚寒者鄭答張逸云晚寒亦晚溫其意  
言寒來既晚故順上傳舉晚寒以明晚溫耳孫毓  
以爲寒鄉率早寒北方是也熱鄉乃晚寒南方是  
也毛傳言晚寒者幽土寒多雖晚猶寒非謂寒來  
晚也正義雖以經上下言九月肅霜與中國氣同  
穫圖乃晚於中國謂非是寒來早明是寒來晚而

亦未嘗不以孫說爲有理也

四月秀蓂毛傳蓂蓂草也鄭箋夏小正四月王荇秀  
蓂其是乎正義蓂之爲草書傳無文四月已秀物  
之鮮矣故疑王荇正與蓂爲一言蓂其是乎爲疑  
之詞也案夏小正之王荇卽月令之王瓜生本草  
所謂上瓜者是也夏小正四月取茶莠幽金履祥  
通鑑前編以莠上屬幽字自爲句張氏爾岐訂注  
取茶爲一事莠幽爲一事云詩幽風不秀蓂得非  
以聲相近而致誤與攷楊慎轉注古音二蕭有幽



字是幽蓼聲相近之證孔氏廣森大戴禮補注直云蓼蓼繞也今遠志草此據爾雅釋草蓼繞棘菀郭璞注今遠志也爲言毛傳云蓼草亦隱用爾雅不知蓼與正義何竟忘此而他引以致疑耶說文解字蓼草也詩曰四月秀蓼劉向說此味苦亦謂遠志世亦謂之苦蓼又有訛爲莠者方以智通雅植物篇辨之云苦蓼一曰狗尾草此相去甚遠豈莠爲狗尾草孔子惡之豈可以秀蓼而存兩可之說乎

五月斯螽動股六月莎雞振羽毛傳斯螽蚣蝋也莎  
雞羽成而振訊之正義斯螽蚣蝋釋蟲文又云  
天雞樊光云謂小蟲黑身赤頭一名莎雞李巡曰  
一名酸雞郭璞曰一名莎雞又曰樛雞陸璣疏曰  
莎雞如蝗而斑色毛翅數重其翅正赤或謂之天  
雞六月中飛而振羽索索作聲幽州人謂之蒲錯  
是也螽斯羽正義引釋蟲云螽斯蚣蝋舍人曰今  
所謂春黍也陸璣疏云幽人謂之春箕春箕卽春  
黍蝗類也長而青長角長股股鳴者也或謂似蝗

而小斑黑其股似瑋瑁又五月中以兩股相切作聲聞數十里是也然則斯螽卽爾雅蜚螽莎雞卽爾雅之天雞其爲二物明矣顧毛傳及正義說莎雞振羽猶有可議故邱光庭兼明書非之曰按諸蟲之鳴出於口喙者多矣有脅鳴者有腹鳴者有股鳴者有羽鳴者脅鳴者蜩蟬也腹鳴者螻蛄也股鳴者斯螽也羽鳴者莎雞也若以飛而有聲爲羽鳴者則蠅蚊之類皆是何獨莎雞也且幽風所言所偶然也以莎雞斯螽之類皆陽蟲也陽氣出

則此蟲鳴陽氣入則此蟲盡著其將寒之有漸勸  
人早備於寒也今驗莎雞狀如蚱蜢頭小而身大  
色青而有鬚其羽晝合不鳴夜則氣從背出吹其  
羽振振然其聲有上有下正似緯車故今人呼爲  
絡緯者是也如或不信可取樹枝之上候其鳴者  
把火燃看卽知其言之不謬孔云飛而振羽索索  
有聲是其不識莎雞妄爲臆說案邱氏所說莎雞  
卽今俗所呼桺桺蟲者與斯蟲之爲蝗類者爲二  
種亦與陸璣疏所謂蟋蟀似蝗而小正黑有光澤

如漆者有別乃崔豹古今注蟲魚篇云莎雞一名促織一名絡緯一名蟋蟀混三物而一之似未免於誤矣

集韻平聲下九麻師加切莎莎雞蟲名釋文莎雞音沙徐又音素和反沈云舊多作莎今作沙音素何反則莎字沈重本亦作沙矣

七月在野八月在宇九月在戶十月蟋蟀入我牀下鄭箋自七月在野至十月入我牀下皆謂蟋蟀也洪邁容齋隨筆以詩七月在野八月在宇蓋指農

民而言非言蟋蟀也

釋文引韓詩云宇屋霑也向北向窓也說文解字向北出牖也引詩寒向墜戶案傳箋不釋宇字此可補注箋釋向字與說文同說文又曰在牆曰牖在屋曰囟囟或作窓牖與窓亦微有別

黃氏曰抄東萊曰十月而曰改歲三正之通於民俗尙矣岷隱曰十一月謂之改歲蓋十二辰至於亥而止復起於子故謂之改歲非三正之謂也孔氏曰改歲者以仲冬陽氣始萌可以爲年之始愚恐

詩意不過以年窮歲極大寒之將至故預爲塞墻之計非必謂塞墻之時爲改歲之時也困學紀聞幽風於十月云曰爲改歲言農事之畢也祭義於三月云歲既畢矣言蠶事之畢也農桑一歲之大事務故皆以歲言之又曰爾詩於十月曰改歲周以十一月爲正蓋本於此案深寧說極名通蓋爾詩改歲只以農畢寒至周有天下遂本此而改正故周禮有正歲之名也

六月食鬱及薁毛傳鬱棣屬薁薁薁也正義鬱棣屬

者是唐棣之類屬也劉楨毛詩義問云其樹高五六尺其實大如李正赤食之甜本草云鬱一名雀李一名車下李一名棣生高山川谷或平田中五月晴食說最詳悉於蓰止言是鬱類而小別耳引晉宮閣銘云華林園中有車下李三百一十四株蓰李一株並未詳蓰之形狀顏師古匡謬正俗嬰與陶宏景注本草云蒲萄作酒云用其膠汁又說卽是江南嬰與恐如北土枳之類橘耳按蒲萄酒卽其多聚而釀之安得膠事嬰與蒲桃種類殊別



江南自是蒲萄北土兼有嬰奧斯則非一物明矣  
此第辨嬰奧之非蒲萄究未明藟爲何物也案司  
馬相如上林賦隱夫藟棣張揖注藟山李也潘岳  
閒居賦梅香郁棣之屬李善注郁今之郁李山櫻  
桃也引張揖上林賦注以爲郁與藟音義同魏王  
花木志燕藟實大如龍眼黑色說文謂之嬰藟詩  
疏一名車鞅藤幽詩七月食鬱及藟此名燕藟曹  
毗魏都賦英梅楊柳若留郁棣原注郁俗謂之炳  
郁張揖廣雅燕藟嬰舌也郭義恭廣志燕藟似梨

早熟此皆補正義之缺又唐韻古音引詩食鬱及  
蓂亦讀作與叶下菽棗稻字爲一韻若爾雅釋草  
萑山韭邢昺疏引韓詩云六月食鬱及萑以蓂爲  
萑說文解字萑艸也引詩食鬱及萑與韓詩同又  
太平御覽引毛詩題綱曰葛藟一名燕蓂藤好生  
河澨邊得水潤而長又以蓂爲葛藟或經字異文  
或後師牽混取備一解可也

呂氏春秋孟夏紀天子飲酎用禮樂高誘注酎春醕  
也是月天子乃與羣臣飲酒作樂詩云爲此春酒

以介眉壽蓋春酒至四月始成而用之也

九月叔苴正義叔苴謂拾麻實以供食也案麻實可爲油其糝可以糞田不止於供食鄭箋瓜瓠之畜麻實之糝乾茶之菜惡木之薪亦可以助男養農夫之具訓義最精

黍稷重穋釋文穆本又作稌案說文解字稌疾熟也引詩黍稷薿稌周禮天官內宰鄭注引詩亦作稌稌初學記卷三白孔六帖卷八十一並同

宵爾索綯鄭箋夜作絞索以待時用訓綯爲絞與爾

雅言紉絞也正合朱子集傳易之爲索絞也紉索也而注孟子則仍用紉絞之訓顏師古匡謬正俗或問曰蒲州盛酒壚謂蒲絢何也答曰此壚旣從遠來運致非易恐其破損故蒲索纏之按爾雅云紉絞也詩云宵爾索紉卽是此義此壚爲加蒲索故謂之蒲絢此又紉絞之證也

初學記卷七引韓詩云冰者窮谷陰氣所聚不洩則結而爲伏陰當是說鑿冰之義

說文解字滕公出也引詩納干滕陰案滕是古文淩

字

朋酒斯饗曰殺羔羊正義鄉飲酒禮以狗爲牲大夫  
與焉則加羔羊言曰殺羔羊是鄉人見大夫而始  
發此言故稱曰也鄉人飲酒而謂之饗者鄉飲酒  
禮尊事重故以饗言之徐與喬云幽民記飲食詳  
矣而用酒惟二介壽親之至躋堂尊之至風之儉  
也

周禮春官籥章掌土鼓豳籥中春晝擊土鼓飲豳詩  
以逆暑中秋迎寒亦如之凡國祈年於田祖飲豳

雅擊土鼓以樂田畯國祭蜡則飲豳頌擊土鼓以  
息老物鄭注豳詩豳風七月也吹之者以簫爲之  
聲七月言寒暑之事迎氣歌其類也此風也而言  
詩詩總名也又云豳雅亦七月也七月又有于耜  
舉趾饁彼南畝之事是亦歌其類謂之雅者以其  
言男女之正又云豳頌亦七月也七月又有稷稻  
作酒躋彼公堂稱彼兕觥萬壽無疆之事是亦歌  
其類也謂之頌者以其言歲終人功之成箋詩則  
以殆及公子同歸以上爲用豳以介眉壽以上爲

爾雅萬壽無疆以上爲頌頌與注禮小殊要三分  
七月之詩以當之也黃氏日抄王雪山謂一詩如  
何分爲三篇章所謂頌詩以鼓鐘琴瑟四器之聲  
合箏也禮笙師欽竽笙塤箏簫篪篴笛春牘應雅  
凡十二器以雅器之聲合樂也禮眡瞭播鼗擊頌  
磬笙磬凡四器以頌器之聲合樂也凡爲樂器以  
十有二律爲之數度以十有二聲爲之齊量凡和  
樂亦如之故迎暑迎寒祈年祭蜡皆合七月之詩  
特以器和聲有不同耳至晦庵則有三說一說幽

詩吹之其調可風可雅可頌一說楚茨諸詩是幽  
之雅噫嘻諸詩是幽之頌一說王介甫謂幽自有  
雅頌今皆亡矣愚按楚茨諸詩於今爲刺幽王之  
詩噫嘻諸詩於今爲成周郊社之詩未易遽指以  
爲幽若如介甫謂幽詩別自有雅頌則幽乃先公  
方自奮於戎狄之地此時安得有所謂天子之雅  
頌惟前一說謂吹幽之聲可雅可頌爲得之而其  
詳則雪山之考訂精矣

鄭氏幽譜成王之時周公避流言之難出居東都二



年思公劉太王居邠之職憂念民事至苦之功以  
比序已志後成王迎之反之攝政致太平正義毛  
氏之意傳訓不明唯鳴鵒傳曰寧亡二子不可以  
毀我周室二子謂管蔡蓋以爲鳴鵒之詩爲管蔡  
而作然則毛解金縢之文其義皆異於鄭又鳴鵒  
箋云時周公竟武王之喪欲攝政成周造致太平  
之功管蔡等流言云公將不利於孺子成王不知  
其意而多罪其屬黨與者喻此諸臣乃世臣之子  
孫其祖父以勤勞有此官位土地今若誅殺之無

絕其官位奪其土地王意欲誅公此之由然王肅  
駁云案經傳內外周公之黨具存成王無所誅殺  
橫造此意其非一也設有所誅不救其無罪之死  
而請其官位土地緩其大而急其細其非二也設  
已有誅不得云無罪其非三也正義引王肅說又  
引馬昭云公黨已誅請之無及故但言請子孫土  
地又據鄭注金縢云傷於屬臣無罪將死謂馬昭  
不然而復爲鄭委曲袒護攷史記魯世家成王少  
在彊葆之中周公恐天下聞武王崩而畔乃踐阼

代成王攝政當國管叔及其羣弟流言於國曰周公將不利於成王周公乃告太公望召公奭曰我之所以弗辟而攝行政者恐天下畔周無以告我先王云云於是卒相成王而使其子伯禽就封於魯管蔡武庚等果率淮夷而反周公乃奉成王之命興師東伐作大誥遂誅管叔殺武庚放蔡叔乃爲詩貽王命之曰鴟鴞自史傳而外考之秦誓以上諸書並無周公避居於東而成王有誅官屬之事班固以遷書載金縢多古文說康成在東漢末

其說未審所出漢唐諸儒皆不從之朱子集傳則從史記及金縢孔傳後覆蔡沈書說數條云弗辟之說只從鄭氏爲是於是蔡沈遂謂居東二年東征往反又是三年此又從鄭氏避之一說而衍之亦非於古別有所本也

文選陳孔璋檄吳將校部曲李善注引韓詩曰鷦鷯既取我子無毀我室鷦鷯鷽鷽鳥名也鷽鷽所以愛憐其子者適以病之愛憐其子者謂堅固其巢巢病之者謂不知託於大樹茂枝反敷之以葦蒿

風至蒿折巢覆有子則死有卵則破是其病之也  
孟子引詩云迨天之未陰雨徹彼桑土綢繆牖戶  
今此下民或敢侮予趙岐注詩邠風鴉鳴之篇迨  
及也徹取也桑土桑根之皮也言此鴉鳴小鳥猶  
尙知及天未陰雨而取桑根之皮以纏綿牖戶人  
君能治國家誰敢侮之刺邠君曾不如此鳥謂鴉  
鳴之詩爲刺邠君與毛詩異以趙引韓詩葦有梅  
證之可知此詩用韓爲說矣又釋文於桑土引韓  
詩作杜蘅同於拈据引韓詩云口足爲事曰拈据

於畜租引韓詩云積也訓詁字義雖與毛詩不殊而大指則乖別矣

孔子家語好生篇幽詩曰殆天之未陰雨徹彼桑土  
綢繆牖戶今汝下民或敢侮余孔子曰能治國家  
之如此雖欲侮之豈可得乎引詩說義與孟子略  
同惟迨作殆予作余與詩及孟子並異今汝與毛  
詩合與孟子異說文解字隸及也从又从尾省又  
持尾者从後及之也或作隸引詩隸天之未陰雨  
案此是古文字

予羽脩脩正義定本消消作脩脩唐石經呂氏讀詩紀並作脩脩則又與注疏本異也

說文解字曉懼也引詩唯予音之曉曉與毛詩異

說文解字霑雨霑也引詩霑雨其濛濛案霑與零古字

通埤雅釋天詩曰我來自東零雨其濛濛善沾濡

又喜陰結不解羈旅之愁於是爲甚故詩以言其

情也深得詩人託興之意或說東山周公悼亡之

詩也敦彼獨宿亦在車下云古喪禮則然熠燿宵

行云燐火婦歎于室云鬼聲憑臆爲言頗駭聽聞

楚辭七諫王逸章句引詩零雨其蒙蒙盛貌與  
毛詩作濛訓雨貌者異

勿士行枚釋文行毛音衡鄭音衙王戶剛反臧氏拜  
經日記經本作衙枚箋云初無衙枚之事王肅改  
衙爲行定本爲所惑因增鄭箋作初無行陣衙枚  
之事以行陳釋經之行以衙枚釋經之枚陸氏音  
鄭箋無行戶剛反則經中行字音亦當同乃以戶  
剛反爲王音鄭則音衙是其學識不盡無據何於  
箋中又憤憤也盧氏文弼攷證引之云案經行字



似不須改毛音衡橫之於口中也鄭音衡亦就行  
讀爲衡王亦不改字而改其音義耳

說文解字蜀葵中蠶也从虫上目象蜀頭形中象其  
身蛸蛸者蜀詩詒蜀本从虫又加虫俗字也唐韻  
古音讀汝叶下野韻

伊威在室毛傳伊威委黍也釋文伊威並如字或傍  
加虫者後人增耳又云委黍鼠婦也本或並作出  
邊案毛傳本爾雅釋蟲文爾雅作蛸威委黍郭璞  
注舊說蛸威鼠婦惟蛸字婦字加虫邊說文作蛸

蟻韓昌黎詩破窻蟻蟻盈並作出邊集韻上聲入  
語蟻蟻博雅蟻蟻蟻蟻一曰蟻蟻或从蟻亦書作  
蟻玉篇亦云蟻蟻蟻雅釋蟲閑隱居云鼠在坎中  
音則負之今作鼠婦如似乖理誤矣

蟻蛸在戶釋文蟻音蕭說文作蟻音夙段玉裁詩經  
小學蟻正蟻訛一切經音義引作蟻蛸在戶云上  
音蕭下音蕭此古字通音也太平御覽卷九百四  
十八引毛詩義問曰蟻蛸長脚蜘蛛也又引毛詩  
義筌曰小蜘蛛長脚者俗呼爲喜子陸璣疏蟻蛸

長跖一名長脚荆州河內人謂之喜母此蟲來著  
人衣當有親客至有喜也幽州人謂之親客採蘭  
雜志昔有母子離別母每見蠅蚋垂緣著衣則曰  
子必至也果然故名曰喜子子思其母亦然故號  
曰喜母均之一物也

熠燿宵行毛傳熠燿燐也燐螢火也正義釋蟲云螢  
火曰熠舍人云螢火卽熠夜飛有火蟲也不草螢  
火一名夜光一名熠燿按諸文皆不言螢火爲燐  
淮南子云久血爲燐許慎云謂兵死之血爲鬼火

然則磷者鬼火之名非螢火也陳思王螢火論曰  
詩云熠燿宵行章句以爲鬼火或謂之磷未爲得  
也天陰沈數雨在於秋日螢火夜飛之時也故云  
宵行然腐草木得溼而光亦有明驗衆說並云螢  
火近得實矣然則毛以螢火爲磷非也案毛以螢  
火爲磷正義已辨之其以熠燿爲磷雖與本草螢  
火一名熠燿合以此詩下章倉庚于飛熠燿其羽  
例之似熠燿止是比擬之詞崔豹古今注螢火一  
名耀夜一名景天一名熠燿一名丹良一名磷一

名丹鳥一名夜光一名霄燭亦承毛傳說朱子集  
傳易爲熠燿明不定貌宵行蟲名如蠶夜行喉下  
有光如螢說本董氏詩故證以說文熠燿盛光也  
引詩熠燿宵行此解確不可易集韻引說文宵行  
作霄行

鵲鳴于埵毛傳埵蠃冢也將陰雨則穴處先知之矣  
鵲好水長鳴而喜也邱光庭兼明書非之曰據詩  
之文勢此埵不得爲蠃冢蓋是土之隆聳近水者  
也按左傳云斂及于埵皇謂寢門闕也又云葬于

埳皇謂墓門闕也凡闕者聚土爲之故知此埳謂  
土之隆聳近水者若坻汙之類也鵲水鳥也天將  
陰雨則鳴於隆土之上婦人聞之憂雨思夫故歎  
于室若以于埳是蠃上于冢則鵲鳴竟于何處豈  
文章之體當如是耶且經無蠃文何得鑿穴生義  
案文選張茂先情詩注引韓詩鵲鳴于埳鵲水鳥  
巢處知風穴處知雨天將雨而蠃出壑上鵲鳥見  
之長鳴而喜毛詩之說與韓同義孟子泰山之於  
邱埳趙岐注亦曰埳蠃封也詩正義此蟲穴處尊

土爲塚以避溼鶴鳥鳴於其上故知垤是蜩豕也  
天欲陰雨水泉上潤故穴處者先知之是蜩避溼  
而上豕鶴是好水之鳥知天將雨故長鳴而喜也  
東觀漢紀沛獻王輔善京氏易永平五年京師少  
雨上御雲臺自爲卦以周易林占之其繇曰蜩封  
穴戶大雨將至上以問輔輔上書曰蹇艮下坎上  
艮爲山坎爲水山出雲爲雨蜩穴居知雨將至故  
蜩與此蜩封穴知雨之證陸佃埤雅釋蟲蜩場謂  
之坻亦謂之垤从至以蜩之微而能爲垤用其至

也此又埤爲蠟冢之證詩人鵲埤二字含蓋天時  
物理之精微毛傳義蘊甚深未可以意訾議也鵲  
釋文本又作鵲按說文鵲小鵲也引詩鵲鳴于埤  
又埤蠟封也引詩鵲鳴于埤則鵲與鵲二字古通  
用也

烝在栗薪釋文栗毛如字鄭音列韓詩作漻力菊反  
衆薪也案韓昌黎城南聯句詩紅皺曉簷瓦黃團  
繁門衡周紫芝竹坡詩話載之以爲黃團當是瓜  
萸紅皺當是棗退之狀二物而不名使人瞋目思



之如秋徑晚行身在籬落間翰謂韓詩二句之妙  
蓋從東山詩果臝之實亦施于宇有敦瓜苦蒸在  
栗薪四語化出也

皇駁其馬毛傳黃白曰皇駁白曰駁正義釋畜文舍  
人曰駁赤色名曰駁也黃白色名曰皇也孫炎引  
此詩餘皆不解駁白之義案文選顏延年赭白馬  
賦李善注引劉芳毛詩義證彤曰雜毛曰駁彤赤  
也卽赭白也

親結其縞毛傳縞婦人之褱也正義釋器云婦人之

褱謂之縹縹綬也孫炎曰褱帨巾也郭璞曰卽今之香纓也褱耶交絡帶繫於體因名爲褱綬繫也案文選張平子思元賦獻環珮與琛縹兮李善注引薛君韓詩章句曰縹帶也縹繫於帶不得直謂之帶章句疏矣韓詩外傳故禮者因人情爲文引詩曰親結其縹九十其儀言多儀也此則粹然精語

王應麟詩考引四國是皇齊詩作四國是匡白虎通引詩作皇前言東征述職周公黜陟而天下皆正

也皇訓爲正案毛傳皇匡也鄭箋正其民人而已  
皇宜訓大而作匡正解者知三家詩皆作匡惟毛  
本作皇毛氏以皇字於義未安故仍用舊本云皇  
匡而鄭亦以正解之班固撰集白虎通時毛詩未  
立於學解爲正知本作匡今白是通作皇後人順  
毛詩而改也

又缺我錡毛傳鑿屬曰錡又缺我鉢傳木屬曰鉢釋  
文於錡引韓詩云木屬於鉢引韓詩云鑿屬與毛  
正相反案說文解子無鉢字木部鉢字解云一曰

鑒韓詩與說文合當是傳寫誤耳

四國是吡毛傳吡化也四國是適傳道固也鄭箋適  
斂也程子曰吡動也爲是四國之亂振動適加於  
吡

輔廣詩童子問東山詩周公能得歸士之心破斧詩  
歸士能得周公之心所謂上下交而其志同也

伐柯序美周公也周大夫刺朝廷不知也朱子初說  
執柯以伐柯卽此手中之柯而得其法以比王欲  
迎周公此不過反之於吾心則知所以近取之道

則吾得見公而陳其籩豆之列將有日矣亦用序說後乃改爲東人欲見周公始難而後易與序不合似前說未可廢也

韓詩外傳原天命治心術理好惡適性情而治道畢矣原天命則不惑禍福不惑禍福則動靜修治治心術則不妄喜怒不妄喜怒則賞罰不阿理好惡則不貪無用不貪無用則不害物性適性情則不過欲不過欲則養性知足四者不求於外不假於人反諸己而存矣夫人者說人者也形而爲仁義

動而爲法則詩曰伐柯伐柯其則不遠精理名言  
宋儒語錄不能相掩也

太平御覽卷八百三十四引韓詩九戩之魚鱣魴九  
戩取鰕茈也案說文艸部茈草也集韻平聲上六  
脂頻脂切筴筴毘取鰕具博雅簞筴謂之筴或作  
筴毘則茈筴二字通用玩韓詩之訓蓋以取鰕之  
具而得鱣魴之大魚有喜出望外意

鱣魴釋文鱣才損反沈又音撰大魚也集韻上聲二  
十八獮鄒免切鱣大魚也詩鱣魴沈宜讀案沈宜

乃沈重之誤

埤雅釋魚詩云九戩之魚鱗魴我觀之子衮衣繡裳  
蓋鱗魚圓魴魚方君子道以圓內義以方外而周  
公之德具焉故是詩主以言之然則鱗象公之圓  
而衮衣者道也魴象公之方而繡裳者義也元衮  
繡繡而後可以見周公猶之九戩之取魴魴也

毛詩草蟲經老狼項下有袋求食滿腹而前行乃觸  
一之退後又自踏踐上蹙其尾進退有患故詩以况  
跋前疐後案史志不著此書之目埤雅釋獸引之

說文解字蹟踰也引詩載蹟其尾與毛詩異

說文解字堅固也引詩亦烏堅堅集韻平聲上二十  
八山堅邱閑切引說文同與毛詩作几几字異

歐陽修詩本義周南召南邶鄘衛王鄭齊幽秦魏唐  
陳檜曹此孔子未刪之前周太師樂歌之次第也  
周召邶鄘衛王鄭齊魏唐秦陳檜曹幽此今詩次  
第也周召邶鄘衛繪鄭齊魏唐秦陳曹幽王此鄭  
氏詩譜次第也按左傳季札觀周樂齊之下卽歌  
幽歌秦然後歌魏杜以注於詩幽第十五秦第十



一仲尼刪定後故不同廬陵所謂孔子未刪之前  
周太師樂之次第本此攷樂記子贛見師乙而問  
聲歌師乙對以歌頌歌大雅歌小雅歌風歌商歌  
齊頌大雅小雅風之次與今詩風小雅大雅頌之  
次正相反而於頌之中別出商風之中別出齊師  
乙亦魯樂師而說詩次與今詩異復與季札所觀  
不同則在魯之周樂失序久矣孔子適周訪樂於  
萇宏必得古大史所藏三百篇定本晚年修訂和  
以中聲故曰吾自衛反魯而樂正雅頌各得其所

毛詩源出子夏則今詩是夫子之手澤也鄭譜王  
在幽後者退就雅頌並言王世正義固言之矣  
荀子大略篇小雅不以於汙上自引而居下疾今之  
政以思往者其言有文焉其聲有哀焉案三家多  
以小雅爲刺時之詩本於此

蔡邕琴操鹿鳴操者周大臣之所作也王道衰君志  
傾留心聲色內顧如后設旨酒嘉穀不能厚養賢  
者盡禮極歡形見於色大臣昭然獨見必知賢者  
幽隱小人在位周道凌遲必自是始故彈以諷諫

歌以感之庶幾可復歌呦呦鹿鳴食野之苹我有  
嘉賓鼓瑟吹笙吹笙鼓簧承筐是將人之好我示  
我周行此言禽獸得美甘之食尙知相呼傷時在  
位之人不能乃緩而不刺之故曰鹿鳴此用魯詩  
說史記司馬相如傳贊小雅譏小民之得失其流  
及上又十二諸侯年表仁義凌遲鹿鳴刺焉史遷  
從孔安國問安國爲申公弟子與琴操合知爲一  
家之說也王應麟詩考引晁氏三家以鹿鳴四牡  
皇皇者華皆康王時詩

孔子家語好生篇孔子曰小辯害義小言破道關雎  
興於鳥而君子美之取其雄雌之有別鹿鳴興於  
獸而君子大之取其得食而相呼若以鳥獸之名  
嫌之固不可行也

蔡卞毛詩名物解引草蟲經云鹿飲食則皆鳴相召  
志不相忌也案蘇武古詩鹿鳴思野草可以喻嘉  
賓焦贛易林升之乾白鹿鳴呦呼其老少喜彼茂  
草樂我君子皆用詩鹿鳴義也

邯鄲綽五經折疑夫笙者法萬物始生導達陰陽之

氣故有長短黃鍾之始象法鳳皇緯書已伏見初  
學記卷十六

承筐是將鄭箋承猶奉也文選盧子諒贈劉琨詩注  
引薛君韓詩章句曰承受也謂受恩承訓受與將  
意隔或非此詩之注

禮記緇衣子曰私惠不歸德君子不自留焉詩云人  
之好我示我周行鄭注相惠以褻瀆邪辟之物是  
爲不歸於德歸或爲懷行道也言示我以忠信之  
道案忠信爲周古人多用此訓

孔子家語正論解引詩是則是效漢書敘傳川詩證  
亦作效與毛詩是倣義同而字異

周道逶遲釋文引韓詩作倭夷考文選潘安仁西征  
賦注引韓詩作威夷險也又孫興公天台山賦注  
潘安仁金谷集作詩注又顏延年秋胡詩注並引  
韓詩作威夷唯嵇叔夜琴賦注引韓詩曰周道倭  
夷與釋文同文顏延年北使洛詩引韓詩周道倭  
遲並與毛詩不異案威夷也夷傷也故以訓險諸  
引作威夷者是韓詩本文作倭及倭遲者後人順

毛而改也漢書地理志引詩周道郁夷班固用齊詩故與毛韓並異

陸佃埤雅釋鳥聽聲考詳篇云雀聲慘毒鳩聲慈念而詩以爲使臣賢者之況詩曰翩翩者雛烝然來思言太平君子至誠樂與賢者共之烝然後得嘉魚壹鳥也爾雅曰佳其鳩鳩夫不壹宿壹宿婦之正也夫或不然故孔子欲多識於鳥獸草木之名四牡曰翩翩者雛載飛載下集于苞栩翩翩者雛載飛載止集于苞杞蓋孝所以致私恩謹所以致

公義故四牡勞使臣之詩而其託况如此傳曰懷  
歸者私恩也靡盬者公義也說義曲折而愜於理  
王符潛夫論三武篇引詩曰王事靡盬不遑將父言  
在古閒暇而得行孝今迫促不得養也此是用三  
家舊說

說文解字驥馬行疾也引詩載驟驥驥案驥是古文  
字

每懷靡及毛傳每雖懷和也鄭箋云春秋外傳曰懷  
私爲每懷也和當爲私鄭志張逸問此箋云中和



謂忠信每懷靡及箋云懷私爲每懷和當爲私而此言忠信愚意似乖也答曰非也此周之忠信也已有五德復問忠信之賢王肅以毛傳云雖有中和者卽上每雖懷和是也孫毓異同評案此篇毛傳上下說自相申成下章傳云雖有中和當自謂無所及卽是上章謂每懷靡及每雖懷和之義也箋旣易之於前爲說於下云中和謂忠信自是周之訓也何得以釋中和乎上下錯戾不可得通正義備載其說而無所斷論而於解箋義曰魯語穆

叔云皇皇者華君敎使臣曰每懷靡及臣聞之曰  
懷私爲每懷是外傳以爲懷私故鄭引其文因正  
其誤云和當爲私爲和誤也鄭必當爲私者晉語  
姜氏勸重耳之辭曰駢駢征夫每懷靡及夙夜征  
行不遑啓處猶懼不及況其縱欲懷安將何及乎  
西方之晉有之云懷與安實病大事鄭詩曰仲可  
懷也鄭詩之旨吾知之矣觀此晉語之文及鄭詩  
之意皆以懷爲私懷之義然則孔氏亦以鄭義爲  
是矣案國語本作懷和爲每懷韋昭解引漢鄭司

農和當爲私亦取鄭義又按列女傳載姜氏引詩  
莘莘征夫每懷靡及云夙夜征行猶恐無及况欲  
懷安將何及矣人不求及其能及乎語意本晉語  
亦以懷私爲說劉向用魯詩此又鄭之所本也傳  
引詩作莘莘是魯詩經本王逸楚辭招魂章句引  
詩旣旣征夫云旣一作莘旣旣往來聲也皆與毛  
詩駢駢不同

毛傳說周爰咨諏及咨謀咨度咨詢云忠信爲周訪  
問於善爲咨咨事爲諏咨事之難易爲謀咨禮義

所宜爲度親戚之謀爲詢皆本春秋內外傳文左  
傳襄四年穆叔曰皇皇者華君敎使臣曰必咨於  
周臣聞之詩問於魯爲咨咨親爲詢咨禮爲度咨  
事爲諏咨難爲謀其忠信爲周本魯語又魯語作  
咨才爲諏咨事爲謀與左傳異韋昭以爲字誤改  
從左傳才當爲事又曰事當爲難餘與內傳同咨  
難爲謀杜預曰問患難也與毛咨難易不同正義  
以爲患難之事亦須訪其難易則毛義固兼賅於  
杜也

淮南子修務訓引詩周爰諮謨蓋毛詩咨謀之異

歐陽詢藝文類聚卷八十九夫移燕兄弟也閔管蔡之失道夫移之華夢不煒煒凡今之人莫如兄弟不著所出蓋有脫文呂氏讀詩記引爲韓詩

左傳僖二十四年富辰曰召穆公思周德之不類故糾合宗族於成周而作詩曰常棣之華鄂不韡韡凡今之人莫如兄弟其四章曰兄弟鬩于牆外禦其侮杜預注周厲王之時周德衰微兄弟道缺召穆公於東都收會宗族特作此周公之樂歌常棣

詩屬小雅案國語周語中載此事富辰引周文公之詩曰兄弟鬩于牆外禦其侮明是周公之詩征南此注實與內外傳及毛詩皆通鄭衆唐固注國語以爲常棣穆公所作韋昭以爲失韋從賈逵以爲周公所作與杜注合

鄂不韡韡鄭箋承華者曰鄂不當作柎柎鄂足也鄭樵曰不象萼蒂形與專通陸璣詩疏柎作跗東哲補亡詩白華絳趺唐詩紅萼青趺皆因之又國語晉語三周華不注之山韋昭注華齊地不注山名

伏琛齊記記摯虞畿服經不與詩鄂不之不同左  
傳成十六年有韎韁之跗六月正義引雜問志作  
韎韁之不注讀如幅注屬也幅有屨也杜預集解  
戎服若袴而屬於跗與袴連蓋不注今字爲跗屬  
此不跗通用之明證蔡邕彈碁賦萼不韡韡用詩  
語鄂又作萼亦古今字程子曰常棣華萼相承甚  
力故以興兄弟說文解字轉盛也引詩鄂不韡韡  
列女傳引詩曰死喪之威兄弟孔懷言死可畏之事  
唯兄弟甚相懷與箋義合

肴令在原本傳隔七年引詩作鴈鴈釋文肴令一本作鴈則唐時本又有作肴鴈者矣

文選左太冲魏都賦劉涓子注引韓詩曰賓爾籩豆飲酒之醢能者飲不能者已謂之醢儻作賓飫作醢與毛詩字異醢字訓義亦不同韓詩外傳卷八引詩和樂且耽與禮記中庸引詩合亦與毛詩異釋文且湛答南反又作耽下引韓詩樂之甚也亦是謂韓詩作耽又王逸楚辭招魂章句引詩作沈說文解字饌燕食也引詩飲酒之饌饌飫古今字



也

文選謝叔源遊西池詩李善注引韓詩曰伐木廢朋  
友之道缺勞者歌其事詩人伐木自苦其事故以  
爲文又潘安仁園居賦注引勞者句作韓詩序王  
應麟詩攷引云飢者歌食勞者歌事又文選祿正  
平鸚鵡賦注顏延年應詔譙山水作詩注並引薛  
君韓詩章句曰鳥微物也當是訓相彼鳥矣義也  
蔡邕正交論周德始衰頌聲旣寢伐木有鳥鳴之  
刺谷風有棄予之悲邕用魯詩亦以伐木爲刺詩

李緯尙書故實今謂進士登第爲遷鶯者久矣蓋自  
伐木詩伐木丁丁鳥鳴嚶嚶出自幽谷遷于喬木  
又曰嚶其鳴矣求其友聲並無鶯字頃歲省試早  
鶯求友詩又鶯出谷詩別書固無証據豈非誤歟  
王楙野客叢書東皐雜錄曰詩伐木丁丁鳥鳴嚶  
嚶出自幽谷遷于喬木鄭箋云嚶嚶鳥聲正文與  
注皆未嘗及黃鳥白樂天作六帖始類鶯門中又  
作詩每用之其後多祖述之也洪駒父謂禽經稱  
鶯鳴嚶嚶要是後人附合僕觀張平子東京賦云

睢鳩雝黃關關嚶嚶然則以嚶嚶爲黃鸝用自漢  
已然不可謂自樂天始也案東京賦猶未顯出鶯  
字梁昭明太子錦帶書姑洗二月啓啼鶯出谷爭  
傳求友之聲唐人求友出谷諸詩濫觴於此

埤雅釋獸引爾雅釋畜文未成羊豸豸未成羊也又  
引詩曰既有肥豸而後言既有肥牡明其禮有加  
而無已且其一章曰伐木許許醕酒有藇既有肥  
豸以速諸父言燕禮也二章曰陳饋八簋言食禮  
也三章曰邊豆有踐言饗禮也何楷毛詩世本古

義本此而小變之云伐木一詩備饗食燕三禮饗  
用太牢詩言肥牡食有飯有殽詩言饋八簋踐邊  
豆燕飲無算爵無算樂詩言有酒清無酒醑坎坎  
鼓蹲蹲舞記所謂周人脩而兼用之者此也

說文解字所伐木聲也引詩伐木所所集韻上聲八  
語所厓爽阻切引說文云云古作厓案此是毛傳  
許許之異

寧適不來微我弗顧戴氏考正此言寧適有不來者  
乎喜其畢來之辭也微猶非也

如微我無  
酒之微 以其畢

來明庶幾非我之不顧非有過於愆惓惓致其親  
好如是箋云寧召之適自不來無使言我不顧念  
意轉疎矣案此說深得詩人忠厚之旨

有酒潄我無酒酤我毛傳潄舊之也酤一宿酒也鄭  
箋酤買也案說文解字亦云酤一宿也徐鍇繫傳  
謂造之一夜而熟若今雞鳴酒也毛許說同於古  
必有攸據蓋酒以陳久者爲善潄潄與酤音義同  
玉篇酤美酒也釋文潄本又作酤又云舊所六反  
與左傳縮酒同義謂以茅泚之而去其糟也一宿

酒易熟製造不及醕酒之精詩言有酒則滑沛之  
足供歡宴假使酒盡卽卒造一宿之酒亦可以共  
醉總是情愛無已之意醕本一宿酒名後市肆中  
多賣此酒故謂賣酒曰醕亦謂之沽說文醕酒疾  
熱也廣韻一宿酒唐韻芳萬切類篇方願切音販  
後人因醕酒之名遂謂賣酒爲販正與此同漢時  
又有官酤漢書武帝紀初權酤注謂禁民酤釀獨  
官開置如道路設木爲榷獨取利也又食貨志魯  
匡言酒者天之美祿帝王所以頤養天下享祀所

福扶衰養疾百禮之會非酒不行故詩曰無酒酤  
我而論語曰酤酒不食二者非相反也夫詩據承  
平之世酒酤在官和旨使人所以相御也論語爲  
孔子當周衰亂酒酤在民薄惡不誠是以疑而弗  
食鄭氏據此因意既有官酤則王亦可買酒以供  
飲因訓酤爲賣也不知官酤乃後世之法周制不  
聞也時方禁民羣飲乃使緝御者挈瓶赴市非買  
酒有是理乎然魯匡在王莽時上言已引詩無酒  
酤我以爲酒酤在官則是三家先有是說而鄭氏

從之耳

說文解字鞞籥也舞也樂有章从章从夆从攴引詩  
鞞舞我集韻鞞通作坎舞蓋鼓字之誤案吳兢  
樂府解題漢武帝滅南粵祠太乙后土令樂人侯  
暉依琴造鞞以工人姓侯故名坎侯後語譌以坎  
爲空則坎是樂器之名坎坎鼓我其擊坎侯之樂  
乎

說文樽舞也引詩樽樽舞我玉篇曰从士不从土蓋  
士旁尊者與樽同方以智通雅謂說文樽从士乃



目耕帖

卷五

許氏臆說自監本爾雅王氏詩考陳氏九經考異  
並从土唐宋人有用樽樽者推樽亦樽之譌从土  
無謂况从土乎翰案爾雅坎坎樽樽喜也郭璞注  
皆鼓舞懽喜春秋元命苞兩口銜土爲喜喜得明  
心喜者爲意樽喜義故从土古人制字具有精意  
未可輕於置議也

王符潛夫論慎微篇引詩曰天祿定爾亦孔之固俾  
爾亶亶胡福不除案此引詩保作祿單作亶何作  
胡頗與毛詩異韓詩唐時猶在而釋文不引韓詩

亦非用韓本也細攷所引詩如檜作會與漢書地理志引詩合說行葦與班叔皮賦用詩合班氏世傳齊詩則符亦習齊詩者也又案桑柔正義引某氏爾雅注引詩亦作俾爾豐厚與王符同

周禮秋官蜡氏鄭注儀禮士虞禮鄭注並引詩曰吉圭爲饔賈疏彼蓋是三家詩案周禮注圭絜也王制圭田亦取絜義與毛詩錫絜字殊而義同矣

禴祠烝嘗毛傳春日祠夏曰禴秋曰嘗冬曰烝正義此皆周禮文自殷以上則禴禘嘗烝王制文也至

周公則去夏禘之名以春禘當之更名春日祠故  
禘祫志云王制記先王之法度宗廟之祭春日禘  
夏日禘秋曰嘗冬日烝祫爲大祭於夏於秋於冬  
周公制禮乃改夏爲禴禘又爲大祭祭義注云周  
公以禘爲殷祭更名春日祠案春秋公羊傳桓八  
年春曰祠夏日祠秋曰嘗冬日烝與周禮爾雅及  
毛傳並合董仲舒春秋繁露此言不失其時以奉  
祀先祖也過時不祭則失爲天子之道也祠者以  
正月始食烝也祠者以四月始食麥也嘗者以七

月嘗黍稷也烝者以十月進初稻也此天之經也  
地之義也

如月之恒毛傳恒弦也鄭箋月上弦而就盈釋文恒  
本亦作絙同古鄧反沈古恒反正義集本定本絙  
字作恒案說文解字恒常也从心从舟在二之間  
上下心以舟施當也引詩如月之恒則許氏只以  
恒常爲訓作絙者因毛傳訓弦而改也

采薇序遣戍役也文王之時西有昆夷之患北有獫  
狁之難以天子之命命將率遣戍役以守衛中國

故歌采薇以造之出車以勞還杖杜以勤歸也案  
竹書紀年帝乙三年王命南仲西拘昆夷城朔方  
與詩序及出車詩稱南仲者合而漢書匈奴傳懿  
王時王室遂衰戎狄交暴虐中國中國被其苦詩  
人始作疾而歌之曰靡室靡家玁狁之故豈不日  
戒玁狁孔棘又云懿王曾孫宣王中興命將以征  
伐之詩人美大其功曰薄伐玁狁至于太原出車  
彭彭城彼朔方則以三詩作於懿王宣王之時蔡  
邕諫伐鮮卑議周宣王命南仲吉甫攘玁狁威蠻

荆則又以南仲當宣王時爲將帥之臣又白虎通  
三軍篇古者師出不踰時者爲怨思也天道一時  
生一時養人者天之貴物也踰時則內有怨女外  
有曠夫詩云昔我往矣楊柳依依今我來思雨雪  
霏霏亦以采薇爲怨詩鹽鐵論繇役篇引詩獫狁  
孔熾我是用戒作獫作戒蔡邕和熹卿后謚議家  
有採薇之思用詩作採漢師傳聞異辭夫各有所  
受也

荀子大略篇天子召諸侯諸侯輶輿就馬禮也詩曰

我出我輿于彼牧矣自天子所謂我來矣我車作  
我輿然則篇名古本亦作出輿也

彼爾維何維常之華毛傳爾盛貌案爾雅之名取諸  
此說文解字荀華盛貌引詩彼爾維何義與毛同  
君子所依小人所腓毛傳腓辟也鄭箋腓當作芘此  
言我車者將率之所依乘戍役之所芘倚程子曰  
腓隨動也如足之腓足動則隨而動也案腓作如  
字解勝舊義將率依於車上步卒腓於車後八字  
寫車行如畫

藝文類聚卷六十引郭璞毛詩拾遺曰象弭魚服毛  
云弭弓反末以象骨爲之蓋俗說之誤也左傳曰  
六韜弭弭者弓之別名謂之象牙爲弓今西方  
有以犀角及鹿角爲弓者

豈不曰戒釋文出曰字云音越又人粟反案一切經  
音義卷六引詩作豈不曰戒與今本注疏同

昔我往矣釋文引韓詩云昔始也文選潘安仁金谷  
集詩李善注引韓詩昔我往矣楊柳依依薛君曰  
依依盛貌楚辭招魂王逸章句引此二句云據詩



所見自傷哀也劉義慶世說新語文學篇謝公因子弟集聚問毛詩何句最佳劉峻注過謝元小字稱曰昔我往矣楊柳依依今我來思雨雪霏霏公曰訂謨定命遠猷辰告謂此句偏有雅人深致翰案謝元將才謝安相度於所取詩語見之

史記匈奴傳於是戎狄或居於陸渾東至於衛侵盜暴虐中國疾之故詩人歌之曰戎狄是膺薄伐獫狁至于太原出與彭彭城彼朔方引詩多與毛詩異鹽鐵論繇役篇引詩薄伐獫狁四句與史記同

惟作出車小異

集韻平聲下十二庚於驚切央幙鮮明貌引詩旂旐  
央央或作幙

韓愈奉和兵部張侍郎酬鄆州馬尙書被召途中見  
寄開緘之日馬帥已再領鄆州之作暖風抽宿麥  
晴雨卷歸旗從出車篇昔我往矣黍稷方華今我  
來思雨雪載塗翻出施肩吾望夫詞自家夫婿無  
消息却恨橋頭賣卜人從扶杜篇卜筮偕止會言  
近止翻出

檀車輶輶釋文輶尺善反又勅丹反敝貌從巾單韓  
詩作輶音同案說文輶偏輶也與毛詩輶輶訓車  
敝義亦相近集韻平聲上二十五寒他干切輶字  
引詩檀車輶輶與陸氏勅丹反微異